

Sepades que don Miguel de Rallat, vuestro mensagero, veno a mi et dixome en commo don Johan, fijo del infante don Manuel, que enfortaleçe et manda enfortaleçer et basteçer los castiellos et las fortalezas que de mi tiene et el a en el regno de Murçia et, otrosi, que Pero Martinez Caluillo que firmo agora por el et asese-go la paz con los moros, et que me lo enbiuades dezir et aperçebir ende porque mio seruiçio sea guardado. Et feziesteslo muy bien et tengouoslo en seruiçio, et yo sobresto enbio mis cartas a don Johan en esta razon.

Otrosy, me dixo el dicho don Miguel en commo Jordan Perez, que tiene el castiello de Montagudo por Garçia Jufre, que tiene el dicho castiello por mi, que uos pendro y tomo yeguas et otros ganados por vna quantia de marauedis que diz que le mengua et a de auer de la retenençia del dicho castiello. Et yo sobresto enbie mis cartas al dicho Jordan Perez en que le enbie mandar que lo desfaga et torne las dichas prendas et que daqui adelante non uos faga danno nin mal ninguno, nin uos prende nin tome ninguna cosa de lo vuestro por la retenençia del dicho castiello.

Dada en Villa Real, çinco dias de julio, era de mill et trezientos et sesenta et VIIIº annos. Yo, Ruy Sanchez, de la camara, la fiz escreuir por mandado del rey.

CLIV

1330-VII-7, Villarreal. Mandato real de Alfonso XI al concejo de Murcia, ordenando que escogiesen un representante y lo enviasen a la reina de Aragón para tratar sobre el pleito de Abanilla. (A.M.M. C.R. 1314-1344, f. 53 r.-v).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de la çibdat de Murçia, salut et graçia.

Sepades que yo mande detener aqui a Miguel de Rallat, vuestro vezino, por algunas cosas que eran mio seruiçio, et el mostrome vna vuestra carta en que me enbiastes dezir que los de Hauanilla que non quieren pagar la moneda forera porque dizen que son en jurisdicçion del rey de Aragon, et que fasta aqui que sienpre me la pagaron.

Sabed que yo enbio sobresto vna carta a la reyna de Aragon, mi hermana, en que le enbio dezir que commo este logar que esta en mio sennorio et que a de pagar la moneda, et que mande a los de Orihuela que non prenden a los del mio sennorio por esta razon.

Porque vos mando que dedes vn omne de entre uos que vaya luego a la reyna sobreste pleito, et lo que con ella librare sobreste pleito enbiadmelo dezir porque yo sepa lo que he de mandar sobrello.

Et non fagades ende al.



Dada en Villa Real, siete dias de julio, era de mill et trezientos et sesenta et VIIIº annos. Yo, Diego Perez, de la camara, la fiz escreuir por mandado del rey.

CLIV

1330-VIII-2, Ecija. Carta abierta de Alfonso XI al concejo de Murcia, ordenando que Pedro López de Ayala permaneciese en Murcia. (A.M.M. C.R. 1314-1344, ff. 56 v-57 r).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de Murçia, salut et graçia.

Sepades que vi vuestra carta en que me enbiastes dezir de commo Pero Lopez de Ayala que se guisaua de venir para mio seruiçio et que teniedes que conplia mas para mio seruiçio que fincase alla en esa tierra para ayudar et anparar.

Sabed que porque yo so çierto que el que me sabra seruir, que acorde que fincase alla porque el mio seruiçio sea mejor guardado. Et quanto a lo al que me enbiastes dezir que le feziese merçed, sabed que yo catare commo le faga merçed en tal manera, porque lo el pase muy bien commo le al el cunple et entienda que he talante de le fazer merçed.

Et desto uos enbio esta carta, seellada con el mio seello de la poridat.

Dada en Ecija, dos dias de agosto, era de mill et trezientos et sesenta et ocho annos. Yo, Johan Alfonso, de la camara la fiz escreuir por mandado del rey.

CLVI

1330-VIII-13, Real de Tebahardales. Provisión real de Alfonso XI al concejo de Murcia, ordenando que no se moleste ni agravie al obispo de Cartagena por ir a la ciudad a recibir al adelantado don Juan Manuel. (A.M.M. C.R. 1314-1344, ff. 59v-60r. Pub. Cascales: *Discursos*, p. 107).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo et a los alcalles et a los jurados et al alguazil de la çibdat de Murçia, a los que agora y son commo a los que seran daqui adelante, o a qualquier o a qualesquier de uos que esta mi carta fuere mostrada, salut et graçia.

